




“It is not the mountain we conquer, but ourselves.”

-Edmund Hillary

MCSA - Tygerberg



Nursery Butress – Tafelberg

Graad	D2 (2 dele met hoogte blootstelling, 'n tou mag dalk nodig wees)
Hoogte vermeerdering	560m: van 160m tot 740m
Tyd	3-4 ure op , (1-2 ure af, afhangende van roete)



Nursery Buttress – 17 Januarie 2015 (Leier: Eben Olivier)

Die Skeleton Gorge/Nursery Ravine roete is welombekend aan stappers as 'n pragtige en maklike roete aan die oostelike hange van die Tafelberg, massief en kan maklik in 'n oggend kafgedraf word van Kirstenbosch tuine se kant. Minder bekend egter, is die Nursery Buttress roete wat 'n meer uitdagende pad vat, reguit teen die steil hange op, tussen hierdie twee ravyne. Alhoewel nie geskik vir mense met



hoogtevrees nie, is dit 'n uitstekende alternatief vir diegene wat ietsie anders soek en nie omgee om bietjie deur bosse gekrap te word nie.

Dit bied uitsigte van die Kaapse skiereiland uit 'n ander hoek uit en is definitief meer geskik vir die wat effens meer avontuurlustig is.

So het dit dan gebeur dat ek (Eben) saam met my vrou Linda die Saterdagoggend die roete gelei het, saam met 6 ander nie-lede. Die vorige keer wat ons hierdie roete gestap het was in effense nat weer in die winter, en my gedagtes het

vasgehaak by die paar amper vertikale rotsmure wat mens absoluut moet uitklim om bo te kom. Een van hierdie het 'n taamlike



blootstelling en is omtrent so 15 meter hoog, maar is darem baie maklik, met goeie vashouplekke. Genadiglik was ons darem slim genoeg om 'n tou saam te bring, sodat ons, jy weet, onwilliges se hande en voete sou kon

vasmaak sodat ons hulle die berg uit kon sleep, indien dit nodig sou wees, vrywaringsvorm en al!

Nadat ons deur die boonste Kirstenbosch hek (Rycroft) ingegaan het (bergklublede kan verniet hier ingaan as hulle mooi vra) het ons die tog aangepak en eers deur die skilderagtige tuine gewals. Die baksteenpaadjies lei mens amper tot teen die kontoerpad, van waar mens dan die begin van die roete moet vind, so tussen Skeleton Gorge en Nursery Ravine. Dit begin dan ook sommer woes deur direk en steil in 'n ongemerkte waterloop op te loop. Die roete word verskriklik min geloop en is op plekke baie erg oorgroei.

Nie te ver op nie het ons die eerste klimgedeelte bereik, 'n strek van omtrent 10 meter, oor twee maklike lysies. Verbasend genoeg (en ook verliggend) klim die 6 besoekers toe sommer net so goed of selfs beter as ek



teen hierdie gradient uit.

Na 'n ruskansie, was die roete maklik en interessant, so al tussen die rotse, kranse en vensters deur, met 'n paar bome wat skouspelagtig aan die kranse vasklou. Tot teen



die kranse het ons aangestap, dan om die berg, dan bietjie op, dan effe af. Die heelyd was daar asemrowende beelde van die Kaap en

Tafelbaai uit die hoek van jou regteroog.

Kort voor lank het ons die moeilikste gedeelte van die stap bereik, 'n langerige klim reguit op, met 'n gevaarlike val aan die linkerkant. Weereens het die groep nie gehuiwer of gekla nie, en is stil-stil soos wafferse solo klimmers sonder toue hier op.



Ook maar goed almal was stil, want ek het gedink, een foutjie of gly, en ons dra iemand Vincent Palotti of dalk na die begrafplaas toe. Gelukkig het almal dapper hulleself opgehys en is sonder voorval, maar miskien met 'n hoër polsslag, bo uit, nou omtrent so halfpad na heel bo.



Gelukkig was die roete nou sommer baie maklik. Die opgewondenheid van 'n paar tegniese klimme was nou verby, maar dit het plek gemaak vir meer praatjies en ons het mekaar beter leer ken. Al die gesels het ons ook honger begin maak en ons het al hoe vinniger, en sweteriger begin stap. Die laaste paar opdraendes kon nie vinnig genoeg afgelê word nie en ons het kort voor lank heel bo aangekom, en onder "Castle Rock" gaan uitspan. Vir die wat stofies gebring het, het 'n warm maaltyd in die koelte voorgelê.



Na 'n lekker lang rus het ons die "hoofweg" roete (ook met 'n paar baie mooi uitsigte) van Nursery Ravine afgedraf.



Onder aangekom, het ons lafenis gekry by die vele waterkrane en skadubome, en die nuwe "Boomslang" brug bo-oor die boomtoppe geniet. Voorwaar 'n heerlike dag!

